

Communicaziun da medias digl cumegn da Surses (nr. 04-2017)

Surses: igl cumegn investescha radond 9.1 milliuns francs an infrastruttura e turissem

La radunanza communalà è approvo glindesde seira cun fitg gronda pluralità igl preventiv 2018. Igl chint da gudogn e sperdita prevei en surple d'antradas da radond 1.5 milliuns francs. Las investiziuns bruttas montan a radond 9.1 milliuns francs. Igl pe da taglia stat sen 100% dalla taglia simpla digl cantun Grischun.

Tar antradas da radond 31.6 milliuns francs ed expensas da radond 30.1 milliuns francs prevei igl preventiv en surple d'antradas da radond 1.5 milliuns francs. Igl cash-flow è tar radond 5.4 milliuns francs e pussibilitescha uscheia agl cumegn, da finanztgier las investiziuns per gronda part sainza capital ester. Las investiziuns bruttas montan 9.146 milliuns francs (investiziuns nettas radond 7.036 milliuns francs) e pertotgan d'ena vart l'infrastruttura communalà cun la sanaziun da veias e conducts d'ovras scu er igl angrondamaint e l'equipaziun dalla deponia Davos Fallung a Savognin. Dall'otra vart vign er investia ainten l'infrastruttura turistica. Uscheia ègl planiso tranter oter da renovar igl bietg digl kiosk tigl lai Barnagn a Savognin e da furmar da nov igl areal digl lai; da manar tras la sagonda etappa digl angrondamaint digl center da cursa lunga a Rona e da realisar ena «veia da velo da muntogna» da Somtgant a Tignas.

Credit per angrondamaint ed equipaziun dalla deponia Davos Fallung

La deponia Davos Fallung a Savognin è igl li principal per la rimnada da rusment digl cumegn da Surses. Per saveir render igl travagl pi effiziant e per saveir corresponder agls basigns futurs, ègl previa d'angrandaneir e d'equipar cumplagnamaintg la deponia igls proxims dus onns. Cun 116 cunter 9 vouchs è la radunanza communalà concedia igl credit d'impegn necessari per igls costs complessivs da fr. 950'000.00.

Ulteriouras decisiuns

La radunanza communalà è decida cun fitg gronda pluralità d'approvar igl contract da dretg da biagier cun la Nova Fundaziun Origen, cun sedia a Riom, per la tgesa communalà digl anteriour cumegn da Riom-Parsonz. Igl contract da biagier vign fatg per ena dirada da 30 onns ed en tschains da fr. 1'000.00 ad onn.

Er cun fitg gronda pluralità è la radunanza communalà decida da cassar per dalunga la lescha da vitturigns digl anteriour cumegn da Savognin. An conseguenza dalla fusiun da cumegn è chesta lescha anc neida applitgeida per igls vitturigns sen territori digl anteriour cumegn da Savognin. Per garanteir igl tractamaint equal da tot igls vitturigns aint igl cumegn da Surses, è la suprastanza proponia da cassar chesta lescha.

Pinavant è la radunanza communalà concludia sainza cuntervusch da lascher igl pe da taglia sen 100% dalla taglia cantunala simpla. Ultra da chegl è igl suveran decida da fixar nignas restricziuns pertutgont las quotas per la vendita d'immobiglias ad esters pigl 2018, tenor la practica actuala.

Ulteriouras infurmaziuns dat igl mastral Leo Thomann (telefonign 079 405 96 73)

Tinizong, igls 27 da november 2017